

珂雪齋近集

珂雪齋近集卷之九

袁中道著

寄李叅知夢白

都門別後未得一耗第于去歲三月歸自漁陽無念亦至公安稍稍悉仁兄動定知精進甚也第于漁陽署中稍有所契久之覺無生知見之力甚微所謂陰境現前瞥爾隨去者真非虛語又古人云入佛不能入魔悟力不充故也竹定是竹笋却不堪作篋世染深重如雪山陳水杲目雖出未易銷融言及至此惟有撫心內愧而已居家苦應酬出來尋朋友却又無

開口處從去歲十月自買一小樓船載書回其中蕩漾江湖冬春二季始窮花源之勝至四月盡乃桓金陵愛其風景佳麗紉宇精潔遂艤舟南門憇于天界報恩間校試之年多士雲集雖無人論學却有數友留看舉業文字皆可造就者第此段障緣未了亦欲借此了之仁兄部下亦近但長夏安居嬾于出游傳聞以入賀行果爾則舟過上河可覓一良晤也人便草率不莊惟原宥

寄蘊璞上人

久不到金陵至則覓石頭菴主云已入楚惟見新竹

千竿熾綠可餐高足弟子法門通家之情請如遂分  
半榻者累日每倚竹長嘯又未嘗不憶種竹人也時  
且有吳越之游不知師何日東歸甚念甚念竹間作  
得口號數句博咲我有千竿竹棄之游白下師有千  
竿竹棄之游江夏我來白下看師竹宛似家園千畝  
玉師行若走江陵路過我家園須少住

答無跡講師

南歸途中卽思從玉泉拉師同尋青溪紫蓋之勝此  
志必酬但目下歸來眷屬相聚未久不能卽杖烏簾  
來耳劉恒沙來云師爲我得異夢果否僕年已四十

餘張果老驢兒不堪作椎磨用但那邊事有着落腊  
月三十日不慌不忙卽勝二十四考中書令也有志  
未逮何以策我

答寶慶李二府

往接慈容恨未深談然從不退聚洲口中備知台臺  
信力甚深真法器也生十七八時卽知有此事初求  
之貝葉文字了無所得其後始知達摩直指一路真  
爲攝精奪髓之法然亦無可措手後又得大慧中峰  
語錄始知此事決要妙悟妙悟全在叅求叅求定須  
純一悟後之修乃爲真修不然卽係育修乃以無義

語時時提撕于今二十餘年矣中間爲功名婚嫁奔  
忙意根他用處甚多又胎骨帶得有繁濃習氣未易  
破除或于機境上忽有省發皆是小休歇處古人所  
云暫時岐路非到家消息也因此亦不敢過望世之  
學者至若眼目已開之人無生之力尚微千生業習  
深重如千年積冰杲日雖出未易銷釋非其見地不  
是力弱故也蓋學之而後知其難耳要之大悟卽真  
休叅求卽是聞思真休卽是修卽所謂返聞聞自性  
何不自聞聞也六用不行放光動地矣如生者數年  
以來叅求絕不純一嗜好亦恒他用自恨骨力不健

爲法門罪人而台臺乃問及盲瞽愧汗甚矣但泥淤中能生蓮花台臺勿問其淤泥可也家仲曾號六休因初入仕時無意游宦乃取司空圖休休亭記中有六宜休語故用六休爲號志無忘山中冷雲耳非楞嚴六用不行旨也一休之旨則謂得其一萬事畢而已矣來教精詳嬰渺非得此道之味者安能深入如此貴治山水酷所想慕况有道在彼敢忘就正但真一居于沙頭與家仲爲伴侶尚未就緒今親會丈悉見之以此暫置樞衣桃花開時有角巾野服而投刺者未必非袁生也風便幸示好音

寄蘇侍御雲浦

傷哉傷哉中郎於九月初六日長逝矣八月初微有  
火疾時起時滅投補劑則發火投清劑則傷胃不藥  
則症日加遂至大小便皆血一夜忽痢五六次而陽  
脫竟至不救初意亦爲小小火病及至後來漸盛雖  
醫者竟不知其何疾也老親七十聞此一哭幾隕弟  
走沙市收殮亡者復走公安安慰生者人生到此生  
理盡矣中郎邇年以來極其寡慾夏三月止坐樓下  
讀書常常說靜坐養生之旨精神全從收斂翕聚不  
意一病遂爾化去豈天不欲留法眼於世耶天假以



年出世之學愈深用世之才愈老決可與陽明近溪諸老方駕而今年竟止此矣弟薄命與中郎年相若少郎同學長雖宦游南北相依會無經年之別一日不相見則彼此懷想纔得聚首歡喜無窮忽爾分袂神色黯黯至於今年尤甚形影不離暫別去郎令人呼喚不到不休弟所以處困窮而不戚戚者止以知己之兄在耳今復化去弟復有何心在世中腸誰與吐疑義誰與析風月誰與共歡山川誰與共賞錦繡乾坤化作淒涼世界已矣已矣恐弟亦不久于世矣仁兄書到之日正一七也發函多悼嘆生死之語弟

不勝驚嘆夢中所云登樓二仲扶之二仲雨而跳行  
此豈非凶兆耶一室孀婦弱子幼女何以度日逝者  
已矣生者之苦未艾也昨見札中切切思歸甚是甚  
是富貴榮華真是幻夢日日波波熱忙送却不好日  
子四十以後陽盛陰衰日夜奔馳俱是生火之資弟  
意以爲決當靜坐收攝早晚念佛嚴持十齋殺生之  
戒以爲去日資糧若得道駕歸來互相策勵究竟此  
事尤可度日但恐弟無此等福耳中郎囊中僅檢得  
三十金其清如此卽弟亦不知其清至此也哭泣中  
草率作此百不旣一統容嗣致

寄丘長孺

兄中郎于九月初六日長逝矣病起之日弟卽夢兄號哭至舍口云予無所依矣相與哭倒在地質明傳中卽有微病人皆以爲無傷而弟竊憂之不料其竟不救也已矣已矣弟雖生猶死也一日不見猶切懷想况今長別寧不斷腸弟所以處貧賤而不戚戚者賴有此耳今若此柰何柰何兄情均骨肉聞此痛傷可知梅長公處俱不及啓想亦不堪悲悼也人便哭泣中草率奉字不次不恭

答潘景升

今年乃有此大痛楚事遂至于知己同心之慈兄  
爾見背天昏地黑令人無復生理自棄捐以來遂得  
嘔血重症幾至不痊公琰至方起梳櫛見兄一函頓  
增感傷嗟乎弟從此如立雪無影人矣衷腸誰與吐  
疑義誰與析風月誰與共歡山川誰與共賞已矣已  
矣惟有飯依如來究竟乘理沙劫有同生之願蓮臺  
覓永晤之期耳去歲客真州正抱重瘥甫勞卽發想  
至秣陵會景升如來偃都觀群真神往身滯實出無  
柰弟以病苦不得往而景升以無病不一來十二年  
交情竟如此哉諸刻甚有意致天趣躍然所徵實歸

弟淒涼中逢交木上座欲焚筆視未能效一得痛定  
當有所寄居家意興索然來春或買一舟來攬黃山  
之勝得覓良晤未可知也公琰回草率奉答不一

寄陶不退

今年乃有此大痛楚事知已之兄忽爾見背苦莫可  
言但喜逝者化去之時從容不亂寂無一語起來便  
遺卽云我畧假寐如入禪定有同坐化夫逝者道力  
深重生死久暫夫復何慮獨生者之苦未易言耳弟  
因此益徵學道之氣分與不同日加叅究決欲到  
古人大休大歇之地往時未忘世樂尚多揀暗今一

切已矣獨恨無友耳安得一帆走白下與兄商確也

與劉計部

弟偶得黃太史一字卽趨至玉泉候之不知其杳然也然弟近來頗有折隱之志見玉泉山水秀邃將遂結菴而老焉北已買得一爰築地山可看泉可聽卽于春初興工營造菴名柴紫閣名堆藍與無跡老人永結念佛因緣行年四十餘矣世界滋味已盡嘗過只是如此而已兄骨肉壽命俱如槿華悉生死到來做手脚不迭以此有志薰修急于收頭又去此地二千里卽是青溪巖洞之勝東南所無更不知眉曉之

前有此青蓮國也弟無心復至城邑聚落赴酒筵法  
席卽西陵之行姑止惟以春初次第收鸞嘯鹿苑諸  
勝望兄于春初來玉泉聚首數日玉泉事體日就衰  
頽去火收田不能無望于大護法之維持弟初三四  
往游紫蓋七八還玉泉兄若來是其時也方遊青溪  
歸草率奉寄

與雷太史何思

弟自中郎去後懷抱鬱鬱胸中如有積塊不得消釋  
觸目增悲以此聞黃太史有入楚消息卽先至玉泉  
人之太史之來不來不可知然弟栖隱之志頗決已

小退居之上贖得百笏之地將建菴而老焉與無  
跡老子看山聽泉不覺便過一日沉痾頓釋自信于  
泉石有緣也近日往遊青溪溪聲溪色自是天地間  
一尤物其上有桃花洞雪雲飛舞真是奇絕汪茂才  
道依溪有田可市若玉泉有菴青溪有田吾事濟矣  
又聞鸞嘯鹿苑山川秀邃將以春初次第收之浪游  
二十年到處覓佳山水而不知臥榻邊有如此秀媚  
境界真所謂曉在眼前人不見也兄春來無事不知  
有遊山之興否如有興弟當陪杖履同往幸寄一消  
息來又玉邊田地事體極是左樣法門日就凋殘幸



有蘇雲浦在臺可以料理改火事須大護法來三張  
主之適遊青溪後過馮濟華丈處以有使人作此字  
奉寄無跡師并寶方皆在統寄聲也

與曾太史長石

自中郎去後弟無日不病飲食日減或夜不交睫且  
堠處竹林中無可共晤言者體中稍稍康泰初意欲  
來繡林效執紼之役而風聞黃平倩早晚且至巫峽  
此番會合恐不能再生死交情不得不徃弟已束裝  
作長逝許會平倩之後當止于玉泉修葺智者洞閱  
龍藏所以止于此者緣老親在堂三百里內招呼易

返耳生死事甚不容易眼見譚禪諸公大限到來手  
忙脚亂如落湯螃蟹全不得力皆由生平學問俱是  
口頭三昧世情實未放下資糧實未辦足故也弟此  
行有出頭路矣田宅給付妻兒新異一婢子遣之出  
嫁入深山中單單理會此事其期以此月之初十日  
成行念吾兄甚又不知暗期在何時也

答雲浦

自中郎去後弟一病幾死今方有起色然胃膈常如  
有物鎮壓飲食減少生平未慣經此愛別離苦也柰  
何柰何生死事真不容易眼見叅禪學道者臨命終

時手忙脚亂如落湯螃蜞直到此地方知乃知未易  
言也自京師回與中郎朝夕聚首細細商確處儘多  
如弟者根器與道甚不相應近來稍發生死心正在  
叅地卽叅處亦未見純一前此督處俱是岐路非到  
家消息陰境現前倏而隨去無自由分未得虛間先  
成放逸世間粗重五欲尚徘徊番連其間未能一刀  
兩斷况其他乎自媿自恨不可言喻又弟兄壽命皆  
促恐朝露溘至倣手脚不迭以此于中郎百日已滿  
之後卽離家獄將家事付與妻兒妾婢數人悉遣出  
嫁卽於此月之初十日同寶方至玉泉度歲暮智者

洞爲禪栖之所上建一閣閱藏桃花開後卽走青溪  
紫蓋去也所以止于玉泉者以老親在堂相去三百  
里內便于招呼耳將發之前二日而兄之函適至并  
得分俸卽可以爲建閣之助不勝欣懽知此事之必  
濟也蓋中郎病中卽云我愈後勅斷家事卽往玉泉  
修智者洞今正成其志耳易簣之夕無際夢諸菩薩  
擁中卽至度門自云與和尚暫別往玉泉去意者自  
由中陰或愛而棲此地耶修理經閣之費有委曲可  
以助成者兄千萬用力卽落成後道駕歸來掃八笏  
之地以待便是現成精藍期于三月粗畢其功不瀆

滯也弟有一園在沙市觀音寺街有瓦屋二重後有  
百畝大塘老桂千霄襍花百種雖在市廛宛如山林  
前爲中郎居此市以相依今已矣其地深六十餘丈  
濶五丈弟旣定居玉泉寘之空曠兄所典鄧家園事  
似不甚妥不若棄之此園之值僅二百金庶而可居  
如兄要留弟卽當留之不以與他人弟以此值修智  
者洞卽于三兄歸時携值了之弟與兄何如肯有纖  
毫之相欺也如其不可自當別市耳不然罔作一  
爲吾輩聚首之所亦妙但弟正食貧時尚難作捨  
之事兄爲之差易耳有便附一字以決去留也而准

遊集高朗雄率仁兄見諱乃至此耶其深知中郎如  
此中郎不死而弟亦有依歸矣但謂中郎便過陽明  
近溪此却不必人不可以無年仲尼四十不惑豈即  
從心不踰之境界哉陽明近浮諸老悟處如百鍊精  
金未易窺測鄧定宇之定也陶周望之淡也參求之  
真切也皆真爲生死者也在大根大器者自宜鄙而  
咲之如弟輩自當服膺以爲師法決不敢開張大口  
自謂過彼也殺盜媮爲佛首戴所以生死相續都由  
愛慾若云以漸除則可耳豈可謂其無妨于道又何  
以異于蓮花比丘尼也年各四十餘矣前途無多轉

盼死期卽至無恒之性事事莽蕩惟願兄痛加鞭策  
使有所成則幸矣幸矣

與夏道甫

別兄後亡兄倏爾下世滿目淒涼遂抱重痾至今尚  
未脫然前過沙頭就藏用處診視復以家冗遄歸家  
小阮云晤兄一次始知道駕已歸恨未得追隨也湖  
上風景若何夢想所欲到恨無翼耳新正卽走德山  
窮德山之勝泛家浮宅不計歸期晤期宵然甚念甚  
念家兄諸刻已盡未刻者無幾草率裁答不一

寄雲浦

中郎去後弟一病幾不得見仁兄至玉泉靜煇家元  
漸離寄情山水方始平復久住玉泉頻夢中郎同諸  
僊真翔集此中無跡亦頻見夢以故立一祠於玉泉  
之右已有次第特未落成耳去玉泉七十里內有鹿  
苑山秀邃無比弟有詩云七渡桃花水十重翡翠城  
可以知其勝也寺爲陸法和茶苑已凋殘甚弟意欲  
新之不知因緣湊否二月內老親抱病過歸故園幸  
已漸安亦不能遠離惟在寶方粥飯堂中作念佛因  
緣而已人便草率寄報不一

與長孺



弟自中郎去後一病幾隕乃入青溪紫蓋中調理數月方得平復弟于世事已矣近日居在古佛堂中隨衆僧粥飯念佛兄弟壽命短促卽致身青雲亦復何用不如趁此無病時早辦資糧弟近况如此不知足日來行徑官京師乎出分闔乎念之念之

寄王章甫

君山歸來懷想不寘老父體中已安稍稍葺理舊業八月初七之日已移亡兄靈柩入村斷腸之泣久而愈新奈何承教訓歸身心如老頭陀甚善甚善戰兢惕厲日愼一日乃人之生賒道之命脉比來誤認本

現成者專言樂而不言惕故逸自恣任情縱慾卽  
在凡民不可而况有志證聖成佛者乎近與蘇潛夫  
聚首數日商確一番彼此洒然凜然恨不令兄聞之  
耳曾太史體中尚未平復所云云當轉致之

寄顧太史開府雍

別來許時懷想無極前者計偕匆匆北去下第後卽  
欲買舟東下作聚首計而家仲之變作矣自伯修逝  
後兄弟二人相倚爲命一旦捐去幾欲相從于地下  
憂能傷人血疾大作不得已逃之青溪紫蓋山中看  
山聽泉以適此生而老親復抱奇恙仍返枊服邇來

側身里間出世無由入山不遂生人之趣幾盡幸而  
稍知空幻之理時取法水灌沃心胸覺無明習氣漸  
以微薄耳先生靜居山中有性命可究有書可讀有  
山水可游適亦安往而不樂想近來著作益富天地  
間之慧人。士放得十餘年閒便爲千古點出無限  
奇言妙義開拓無限心胸如生者不知何時聆玉屑  
而讀瑤篇也晤期宵然言之惻惻

寄周憲副海門

前承念及家仲遺之盛奠已有字報謝不知徽旨竟  
否近來法門荒涼道侶凋落真無開口處向時即欲

入鄂效順風之請而台臺行矣今之學者儒禪並進  
若較盛於往時然其實陽明先生良知二字未見有  
人透過者蓋徒見宗門中乾屎橛麻三斤青州布衫  
七斤便作奇特想而良知二字平田裏荊棘多視以  
爲尋常不復究竟所以未見真種子卽終日修持皆  
歸生滅耳不審台臺以爲何如生于此道粗有所入  
而說強習重處道力甚微且無友朋薰習終歸墮落  
言之可爲泣下有便寄數語以相砥礪萬萬

寄錢太史受之

京華一別之後得一奉手教不啻晤言復見尊稿序

中諄諄齒及于弟知兄之不忘弟也弟之薄命奇窮  
所不忍言身世淪落已矣乃不意相愛相知之慈兄  
一旦舍我而去顧影淒涼何以度日憂能傷人血病  
大作遂逃之青溪紫蓋之間誅茆而老焉聽泉看山  
不覺沉疴頓起而老親之病繼作不得已復返初服  
夫天下之可以自由者莫如栖隱山林退藏一路正  
爾不能得可奈何邇來闕步鄉間上慰病親下撫孤  
稚豈復有生人之趣幸而稍空幻之理時取法水  
灌漑心胸覺無明習氣漸以微薄區區功名無論不  
可必得即得之有纖毫益于生老病死者乎受之于

世間法粗已了畢上之究竟性命之理以心學採爲  
作用其次讀古人之書撥膚見骨發爲詩文另出機  
軸垂清光于百代至于名山勝水優游徜徉其間無  
非樂境快矣快矣若夫繁華游冶丈夫心力強盛不  
得意時稍以文其寂寞正如游雲變霞豈有畱礙知  
受之覷破久矣弟子此亦大有豁也目前光景若此  
卽欲走數千里外與吾受之一聚首劇談也豈可得  
哉因禪友怡山東歸之便附字奉候固是了元天如  
一等人一晤之且可悉弟近况也

寄黃春坊平倩

伯修去後已自淒楚不忍言所倚以爲命者一中郎耳今又舍我而去傷心次骨一病幾至不起弟不難相從于地下柰老親在堂不得已屑涕強笑異少慰之今惟仁兄可依而道途遐邇亦未能來也但榮發在邇取道荆郢時可得一良晤卽餘生之大幸學道多年已見真消息但知見之力甚微而居家無好友朋塵染薰習時傷苗犯稼柰何仁兄此一出非獨祉稷之福實弟等聚首出世之良因也人楚塞時望先馳一字以便趨侍人行作草率不盡欲吐

與雷何思

居玉泉而月候兄不至遂徧游鳴鳳鹿苑諸山泉鹿苑之奇拔地石峰峰色如砂翠而水濼七渡流聲震天地不獨楚中所無卽天下亦未見如此奇勝也寺久凋敝弟頗懷修葺之想聞仁兄亦有此願不知果否法和居士自是郡中第一個神聖悉亦當表章也長石有字來道及仁兄四月內有東下意果爾弟當掃三逕以待中菴從北來弟畱之過夏而渠欲一至西陵奉晤弟所修玉泉柴紫菴正少主人得此君淨修其中遠希白社故事亦甚快望仁兄爲贊成之何如



寄雲浦

仁兄歸來弟卽擬走小龍湖頗教但繡斧新歸自有  
一番應酬俟小定卽當棹一舟來此中積懷萬斛恨  
不得卽傾倒也至于暑溽實所不畏得聆知己之談  
說甚龍皮扇乎弟十年中哭而兄淚盡矣兩眼昏花  
鬚髮皓然已無復進取之想家門多夭折蘭田弟近  
復不祿可憐可嘆弟近日東西遊覽亦非耽情山水  
借此永斷嬀慾庶幾少延天年耳適從村中歸特遣  
小僮致數種山青水綠人事萬惟此存作得詩一章  
求教統之聚首有期非一紙所能盡也

答會太史

弟住玉泉兩月山水怡情不覺舊病頃愈不意老親  
體中違和星夜過歸幸而漸安一月間必可全愈弟  
又可作玉泉主人矣何思所云樓閣者弟無力建造  
惟于玉泉右側建一亭半山望西南諸峯如堆藍其  
下建一堂以祠關聖賢及兩兄于中堂于此月之初  
五日建豎有無跡老人鹽視玉泉長老督功弟安享  
其成不勞心力也青溪鳴鳳鹿苑諸山俱秀媚之極  
至于鹿苑峯色水聲實是東南所無陸法和居士賞  
鑒大是神眼弟住止玉泉去高安諸山水不過一日

程中郎去後世念已灰願作一老居士游行佳山水  
間足矣不審仁兄體中近日若何前所寄字弟入山  
不得覽歸時覓侄輩已爲烏有以此欲問仁兄動定  
甚急使來甚懾倘有游山之興同往玉泉住數年應  
酬旣絕百念不生何愁體不復原弟所作菴卽兄之  
菴不必分彼此也去與不去幸寄一字或秋以爲期  
亦佳弟往日學禪都是口頭三昧近日怖生死甚專  
精叅求不卽往玉泉則止二聖禪林酒色已戒多時  
仁兄見念感切感切不見可欲使心不動畢竟深山  
之中爲得計耳詩文二紙呈覽

寄寶方

近日看師地論聞所未聞方徵慈氏之苦心一字一滴血諸論中警策綿密未有過之者若非在山中安得遇此秘密法藏令不肖道念日切世情日隳矣山中雖無伴侶亦頗不覺岑寂知方偕怡山諸戒衲修法華懺又令我技癢甚七八月內山中禪成便可修舉也生于二月末或一歸方收拾來山作長住計無跡老人情同骨肉鴈行之悲爲之少釋已于響水潭上作菴爲卜鄰計是又一快也會中諸位衲子統希申意

又

堆藍亭已落成在原基之上十餘步見西峰層疊乃  
荆浩關同得意筆也塔灣田山僧窮極欲質當他宅  
生爲山門只得勉強成之家舅處幸一徃道意此時  
要三十金最緊是必爲催來也不知怡山師有來意  
否前承銀杏之賜讞謝

寄八舅

山中已作久住計堆藍亭已完正在修理廳堂大約  
山水中靜坐極清閒快樂目下有泉田一區四面山  
色包絡山之下爲泉泉之內有田去甥所作楚不過

若得此卽不減輞川也老舅無事來一遊必賞  
心之甚故本來縣不晦之作何狀

寄四五弟

山中已有一亭次第作屋辰起閣藏經數卷倦卽坐  
亭上看西山一帶堆藍設色天然一幅米家墨氣午  
後閒走乳窟聽泉精神日以爽健百病不生吾弟若  
有來遊意極好三月初間花鳥更新奇來住數日煙  
雲供養受用不盡也

寄孔令君

久不奉慈誨渴仰殊深生自家仲逝後遂抱痼病爬

尺未得瞻禮戟下想台慈不至督過也殘臘體中稍  
忒偶黃太史有信東下遂至玉泉遲之不意來期尚  
宵自到此處仰見堆藍之山俯聽濺珠之水不覺骨  
體俱輕神情爽豁遂買一峰構精廬其下將窮三藏  
之秘典發五宗之玄微捐梁肉而餐伊蒲舍綈錦而  
服芟荷石丈竹君梅妻鶴子將于斯焉老矣所幸家  
嚴健飯而弟奉養生雖不敢遠遊亦庶幾可以近遊  
至若慈臺春風夏雨一邑含膏生雖在山中受賜實  
多百凡更祈大爲培植使山中人免于內顧卽慈臺  
非常之大造也沙渚暫歸柴車可駕更得望見清光

堵倦倦

寄怡山

匆匆入山未得奉別不審道體日來若何想已平復  
矣玉泉青溪之勝卽吳越未見其比幸一命駕來此  
同往數月此中大有藏可閱已市木作一小菴于別  
峯下計日可成矣亡兄旣去世念已灰此卽是我安  
身立命之處師如不棄便可卓錫

寄八舅

自別老舅入山無日不快你看堆藍之山色俯聽跳  
珠之水聲神骨俱清百病消除寺內有舊菴基正堪



山水之勝已傾囊罄得旦晚市木修造有次第矣此  
去十五六里卽爲青溪峰巒洞壑殆非人境到此板  
伊蒲絕嗜慾覺得容易遣日自信于山水有緣聯榻  
不寐遂有此一番佳境界非愚甥不能造此思路非  
老舅不能賞鑒也已矣已矣胸次舒泰耳目清淨豈  
非福耶二三月內此中山色泉聲更當十倍老舅如  
有山行之興當掃乳窟以待

寄六侄

存亡徂遷倏忽易歲惟夜夜入夢有若平生耳海內  
第一一既去復何心世緣玉泉青溪山水幽絕將

有終焉之志歸期都未可定想已入社矣酌寬嚴之中以處家酌豐儉之中以理財寡慾養身修名避訛是所望也

寄新年

自到山中閱藏習靜看山聽泉不圖爲樂亦至於斯已頃囊中得一峰將于其下建菴而老焉誓畢此生苦心參究了佛祖一大事因緣决不奔波紅塵終日爲人忙也汝年正少自當向學支持門戶使我得心安爲世外閒人卽汝至孝吾往時所以不長往者以汝二伯在友于至篤不能相捨耳今何時也匠人輟

成風之巧伯子息流波之音立雪無影惆悵何言惟  
覺青山解語綠水知心伊蒲可以續命貝葉可以忘  
年暮春三月河渚暫歸柴車可駕當一歸來旋卽入  
山不俾晦朔何者吾賦性坦直不便忍嘿與世人久  
處必招愆尤不若寂居山中之麋鹿而侶梅鶴此其  
宜居山者一也又復操心不定朱紫隨染近繁華卽  
易入繁華邇清淨卽易歸清淨今繁華之習漸消清  
淨之樂方新而青山在目緣與心會此其宜居山者  
二也兄弟俱闡無生大法而爲世緣追逼不得究竟  
今居山中一意理會一大事因緣必令微細流注蕩

然不存此其宜居山者三也骨肉受命慳薄惟盡有  
嗜慾可望延年業緣在前未能盡却必居山中乃能  
掃除此其宜居山者四也生平愛讀書但讀書之趣  
須成一片俗客熟友數來騁擾則入之不深得趣不  
固深山閉門可遂此樂此其宜居山者五也蓋我之  
住山乃從千思萬想中得來誓捐軀命以守此志且  
鳳凰不與凡鳥同群麒麟不代凡駒伏櫪大丈夫旣  
不能爲名世碩人洗蕩乾坤卽當居高山之頂目視  
雲漢手捫星辰必不隨群逐隊自取羞辱也因汝可  
與言故畧及之

寄五弟

山中百凡清快紫蓋之奇峰青溪之碧水玉泉爲山  
水之大湊愚兄行止其間卽是養生何者屏絕慾染  
羶薌不求養生而養生在其中幸以此意悉之老親  
老親真壽者相無可慮所慮者吾輩之壽耳進山一  
步卽是活路出山一步卽是死路吾志已決阮孝緒  
何子皙吾之師也

寄李謫星

殘歲偶得黃太史一札云至西陵卽走玉泉候之以  
故未得於老伯前敘執拂之役此中抱歉之甚想春

走道途仁兄或見亮也自亡兄去後懷抱鬱鬱見紫  
蓋堆藍之山色不覺心意爽豁向時胸中積塊俄爾  
冰釋乃知山水是療病之妙藥卽于是中結庵買田  
將有終焉之志元定兄有字至亦于燈節後見過政  
恐吾兄方擁臯比不得來共聽乳窟泉聲耳小价歸  
匆匆付一字有便寄數語山中人以破岑寂也

寄王章甫

一聞仁兄將至狂喜欲舞且復淚下生死交情於今  
見矣數日內風雨大作長江之險不收卽渡雨止卽  
來倘天色連綿仁兄是必多留兩日仲宣樓章華臺

龍山落帽處必當陪遊且公安三聖寺有李龍眠羅  
漢趙子昂法華皆不可不一觀者先此奉懇但微示  
齋色弟卽飛來且將以小舟送仁兄於岳陽樓前作  
別耳至懇至懇

答夏道甫

得兄札正遊鹿苑雨色甚奇甫霽卽欲還堆藍而遠  
安公專期于十二日其情甚切不得不赴淮于十三  
日鷄鳴卽歸兄幸暫止玉泉來此亦不易乳窟流泉  
可聽勿便作興盡之返也至禱

答黃駕部取吾

宋孝廉至得手教甚慰弟遭骨肉之變兩兄相繼去世至中郎相依爲命一日不晤便無以爲懷今生死永隔柰何自長別後弟遂抱重病幾死今方有起色已于玉泉買山作終隱計伊蒲送日兄自學仙弟自學佛但能輕視世緣精進不懈各有所成不愁墮落也中郎未有大病偶以下血脫氣遂至不支然心無怖亂有若坐化渠自是天堂佛土中人至于學問之綿密應世之圓妙弟與兄皆未必能測度之但當合掌歸依而已知已如兄不作粉飾也急欲圖一晤弟不難千里行而老父抱病難于遠離晤期未知何日



言之惘惘

寄尹夷庚

大別山頭一別升，沉生宛有如幻霞。真之不足道也，弟居家鬱鬱無歡筆硯久廢，第思二毛種種矣。學道之外，佐以看山讀書，豈能長奔波世路耶？所恨藐焉孤儔，口如銅鳥，安得沈酣風雅如吾兄者，常時聚首以慰饑渴也。寂子相與已久，近日至山齋，少聚便道過貴村，敢以一字奉詢，知兄于般若緣深自聆睽之矣。

寄潘景升

周子國至得書弟屏居村野未到沙頭尚未會子國也弟已如失群孤鴈到處飲啄以消渴愁奈老人體復多病常時周旋一室卽當陽玉泉已卓一菴栖隱尚不能往則其他可知矣東下之役空付夢想吾兩人合併竟不知在何時此生乎他生乎都未可卜念此不覺淚涔涔也近作中極多可豔異事柰一時抄寫不及當以付周子國來

寄曾聲子

初聞尊大人之變不忍遽信及自澧州回得寶公字備知化去事痛苦割腸其悲與悲先兄等也先兄去

後生兄尊大人而尊大人亦弟畜我老來相依恃有  
此耳乃竟若此耶且交游中求如尊大人之知我愛  
我者有幾人耶傷哉傷哉兩年之間楚中失三詞人  
使生若孤鴻斷鴈天乎天乎罹禍乃爾酷也已矣生  
已治入山之裝不復作人間世事也聞辭世時頗安  
閒其景象作楚否可得聞否兄丈幸一一示我老父  
新喪不能出弟先遣一介申唁八月中從玉泉歸來  
當走一哭致少生芻也草率不盡統惟節哀自愛不  
一

寄析年

山中度日頗快黃太史已下世矣愈增我之道念也  
從六月初一日卽食素起以山中無他物正好食素  
也我定居于此如古陶弘景之茅山故事七月終當  
一歸卽入山矣汝努力作世間事使我得安心辦道  
卽大孝也餘不一

寄寒灰禪師

中郎一旦至此令人痛不欲生師情均骨肉雖修短  
之理久已照破而亦不能已于慈明之哭也生屢番  
清徹自謂已至而習重境強處無生之力甚微古人  
云相續也太難又苦口勸人盡却今時乃知入理之

後便要討見成受用十二時中微細流注全不照管  
臨終不得力都由此耳宗風旣墮大厦非一木可支  
後生輩無大福德纔有所見便作乞兒相以一飽爲  
足不堪種草不若潛行密用爲妙蘇潛夫已修一菴  
沙市欲約師來作蓮社主人亦一快也怡山來草率  
奉報不盡欲吐

寄林白雨

弟賦命奇窮老親修爾見捐無心世緣將栖隱山水  
永作苦行頭陀矣山中清寂真堪度日兄走煙霞氣  
多清秋能過我園椒乎黃慎軒居士亦下世矣法門

淒涼真可嘆也花山爲吳中勝地有大雲上人者以  
造殿至楚携有錢受之太史書欲弟稍爲經營已若  
有次第兄太多事之日豈可復以緣事相累但得轉  
爲流通足矣餘不盡

寄八舅

入山未得詣別甚念念山中清寂甚與嬾拙之人相  
宜小菴已畢功清秋當迎道駕少玩數日也黃慎軒  
遂已棄世間使甥道念轉深哲人旣萎流波空引柰  
可大雲事體稍有次第望老舅大力提挈一二當此  
多事之時豈可輒云捐財但委曲推廣稍加盼矚則

爲德大矣

寄夏道甫

山中清寂晝着夾衣夜蓋木棉被樹較前益深泉更  
響小菴收拾已完明窓淨几掃地焚香讀書差有李  
禿翁當日風味如此光景豈可不使道甫見之清秋  
烹馬一來同往鹿苑爲妙也但恐有人阻遊履耳然  
亦是慧心人決可與言山水之妙者一咲一咲大雲  
緣事承周旋望爲留神也山中極宜大爆竹每放一  
爆則響半日始息千萬瓦百十個付大雲或小价寄  
來至禱至禱

答葛寧宇

久不奉教渴仰殊深賦命奇窮父兄相繼不祿世念已灰捨喧入寂得于堆藍之中作一太平之民親近兄丈爲垂老經心之友是所願也衰經在身未得躬晤乃承盛貺遠頒感愧兼之至于茶菴之說偶與次飛言之卽果有此意亦必備原直奉上乃蒙慨付原約兄丈之誼高矣其如獨爲君子何今不敢孤負盛美暫留此經俟次飛入山卽有以復也草率奉謝不盡欲言

答錢受之



大雲來得手教備悉近况前有同叅衲子怡山入吳  
有數字寄詢不知已入目否弟日來以親病未平株  
守故里稍稍葺理簣簣谷種花讀書以自遣日自先  
兄亡後生死之念轉切困心衡慮中於此道稍有所  
契舉業亦不多作自咲髮已種種矣豈能常作此耗  
心血事去六十歲止得十七年忙忙打疊那邊事尚  
恐不迭何心逐逐世緣也前年買得一侍兒去歲復  
遣之江陵沙頭市得一圓組有花木親病稍間卽渡  
江往住相依惟二三淨侶久不飲酒間飲地黃酒數  
杯頗覺神明清爽自念生平無一事不耽酒悞學道

無成讀書不多名行不立皆此物爲之祟也甚者乘興大飲後兼之縱慾因而發病幾不保軀命又念人生居家閒而無事乃復爲酒席所苦非赴人召卽已招客爲杯勺盤餐忙了一生故痛以招客赴席爲戒落得此身閒靜便有無窮好處讀書看山尚是餘事真大快也山水可以代粉黛兄疑世間人因偃爲恭耳弟自謂從古來不得意於世緣因而自甘清淨以至于成仙得道者不可勝數卽如陶弘景初求縣令不遂然後棄妻子隱于茅山之積金澗故自云吾永平中求祿輒不遂使遂吾安得享此古多以惡疾而

致冲舉者其初俱非忘情世樂者也特世樂之路已窮不得不尋寂寞之樂蓋久之覺寂寞之樂遠出于世樂之上然後悔向者馳求之非計此亦機緣湊合使然乃學道者之幸也夫處繁華之中而不忘清淨之樂居寂寞之中而永斷繁華之想者此自是一種上根上器不易得也若夫世樂可得卽享世間之樂世樂必不可得因尋世外之樂古之高人達士多出于是陳搏邵堯夫皆非忘情富貴功名者也知其不可得而走清淨間適一路耳惟世間一種俗人處世樂而更作無涯之求世樂不可得而厭寂寞如牢獄

世樂若天堂終身戚戚而無已時則真可懼也昌黎作盤谷序列三項人最爲先獲我心蓋繁華有繁華之樂寂寞有寂寞之樂惟兩處不成馳求不息者爲下策耳昔人謂白樂天于功名富貴得之則忻忻失之則戚戚備見于詩篇之內弟則謂白公原非忘情于功名富貴者得之忻忻失之戚戚正是白真率處而其實有一種解脫之趣去人甚遠如其初居江州未嘗不苦然却往來廬山作草堂躡飛雲履鍊金丹看山聽泉讀佛書苦之中樂又生矣蘇公亦然蘇公初居黃州亦未嘗不苦然却優游臨臯雪堂之間

泛舟赤壁彈江水看山苦之中樂又生矣謂兩人不  
求世樂吾不信也謂兩人世樂不遂而竟爲寂寞所  
苦吾亦知彼必不爲也雖然卽得世樂而享之亦豈  
如世人之享世樂者耶于霹靂火中常現冷雲相故  
可貴也兄書中道及嘲胡仲修語將謂世間人遊山  
水者乃不得粉黛而逃之耳非真本色道人也此真  
覷破世人伎倆也弟則謂不得繁華粉黛而能逃於  
山水以自適者亦是世間有力健兒因偃爲恭遂成  
真恭者多有之以此發揮數語博三千里外一咲不  
自覺其語話之長也弟近來無可共語人矣海內僅

一受之又不得頻頻聚首今受之已離寂寞得世樂矣往日所云死得過者親見之矣曾記寫大字帖送卷價否腕中有鬼非偶然也三筆之夢已先定矣定命如此馳求何爲弟以處處貧賤而不戚戚者爲此也細觀受之具有世外靈骨決非汨沒于富貴功名之人然逆境易持順境難持順境之中所求易遂徃徃徵逐世樂斷送了一生卽如江陵相公少時便有氣魄曾讀華嚴經悟得諸佛菩薩以身爲世間牀座經河沙劫救度一切有情便有實心爲國爲民之志刀刀見血不作世間吐哺下士虛套子可謂有大人

相矣却是脚跟下帶得一種無明習氣及富貴聲色  
情慾甚重所以事業不光大緣生平不學大道不得  
無生知見之力重濁而不清脫故縱習氣情慾而不  
能超拔出也乃知世之真正英雄若不干本分事上  
七穿八穴之後于夢幻泡影中以曼殊智作偏吉事  
業不過只是健狗豪猪有何足貴願吾兄打併精神  
覷破向上一路王文成是兄師也花山緣疏花攢錦  
簇讀之齒牙三日猶香如此美才發泄天地精靈太  
甚更須十分退藏爲元吉也弟家事粗遣妻妾輩皆  
持戒作佛事小兒爲伯修嗣名祈年者甚知向學中

郎長子名彭年者大有才氣酷似其父先兄不死矣  
弟已拼作一老孝廉騎款段作馬少游佇看兄三台  
八座訪我道山也老兄既作貴人應酬不簡清貧作  
何支給借債大多後亦爲累甚爲兄慮之大雲緣事  
需之歲月可望其成今年不知何月起復到長安此  
一番聚首于舉業文字外當更有商量處也游玉泉  
諸詩寄覽有便卽付一字草率不恭幸恕

寄劉元定

久不奉教懷想殊深昔時長安聚首諸公多半鬼錄  
惟弟與兄存耳幻泡風燈真是可嘆弟入夏來玉泉



與無跡老人朝夕堆藍社修葺已完移居其中響水潭亦建一圓蕉仰看山色俯聽水聲如此受用數十年便勝二十四考中書千倍萬倍也聞東山景物甚佳老來諸嗜灰冷惟山水之趣久而愈深然我兩人不可不一合併跡公相念甚切秋來能一至山中乎二聖寺欲塑大士壁間貴州有塑工甚佳名魏跛子今不知尚在否煩上价一尋訪之至望

答錢受之

華山僧寄手書來備悉近兄弟今歲杪春遭家嚴之變父兄相繼而亡痛不欲生逃之玉泉山中稍有起

色復以家務遄歸故人書斷絕已久惟受之不忘我  
且作長語相反覆此誼豈可易得已造得一小舟當  
以明正涉江直走吳越恐仁兄春間入都不及一把  
臂也弟此時欲盡收東南之勝期不問年旣無繁華  
且安寂寞耳一切大雲能口之大雲古貌慧心甚覺  
嫵媚因其便附字奉候不盡欲吐

寄曹大叅尊生

自章臺寺別後不旬日間遂有家大人之變不肖五  
內崩折功名之失得不足論身世之淒涼大可悼也  
乃六月中又聞黃平倩先生之訃不肖與兩先兄及

陶黃二先生爲兄弟中之朋友爲朋友中之兄弟今  
皆先我而去如何爲懷不肖與先生二十年前長安  
燈市一交臂而失之昨者之晤別後依依不能相捨  
豈非聲氣應求有出尋常交情之外者耶已拚一麻  
一米作世外人間亦有卜築匡廬之興果亦他年相  
依而老亦一快也明年亦欲東遊將盡收東南之勝  
晤期尚未卜何日少年勉作詞賦至于作詩頗厭世  
人套語極力變化然其病多傷率易全無含蓄蓋天  
下事未有不貴蘊藉者詞意一時俱盡雖工不貴也  
近日始細讀盛唐人詩稍悟古人鹽味膠青之妙然

求一二語合者終無有也此亦氣運方力所限今  
近作數十首來教幸細爲批評如何久不作應酬詩  
惟山水之間可以發人清遠之韻者稍稍點綴數語  
此後亦欲定交木上座擲却管城公矣先生詩清靈  
俊逸寔中心佩服然此外亦別有事在不欲先生役  
精神爲之也部下士有可與論學者否

寄長孺

弟之奇窮世所未有中卽旣去家嚴繼之兩年來如  
醉如夢強以山水之樂苦自排愁破涕生平桑梓親  
厚交游僅得一曾一雷此外皆異方之樂也而二公

復先我而去黃平倩仁兄亦以今年夏初不祿弟聞之其慘戚不啻伯修中即想兄聞之更自淒惻耳半年以來竟不得兄一消息久不陞僊不知何故豈都中榮轉此外不知耶近來興致若何囊中得無羞澁否弟今年不得會試下年便是一老翁矣進取路窮却得些閒靜光景明春亦欲東游不知如願否也

又

半年不得兄一字甚念甚念自中即去後心神淒涼百感橫集姑集山水禪悅以自排遣苦則苦矣心知功名之途遠翻於此中得些閒淡光陰郡時與夏

道甫聚首此外更無人往來也兄官况畢竟如何身上無債否如無債可陸沉度日過數年兄便是五十翁弟亦近五旬矣世局日熟道念日生又不知作何結煞也弟近製一舟前後可安六槳中列軒窓可坐十人將以明年正月作東南之遊載米百石書千卷放浪江湖且欲徧覽名山勝水失馬得馬安知非計也

寄陶不退

弟自家嚴捐棄之後已修一菴玉泉山中將終老焉以故不得常居家中故往來詢問闕如人情世態堪

爲痛哭仁兄會計偕舍親輩自當知其詳也學道二十餘年種種不見得力熟處愈熟生處愈生明年當往東南求友不獨明眼悟道人可爲我輩宗師卽有志學道十分以生死爲念者便是弟輩之舟航也卽君旅櫬已更修矣黃腸完好如故可無慮也

寄梅長公

大下事不可知先兄捐棄之後家嚴繼之四五年後弟便是一白髮老翁與栖隱有分與進取似無緣矣然以絕意世路之故微得些淡泊閒靜消息彼造物者能窮我矣然不能使我不讀書使豕不看山水使

我不學道也得其一已足消遣况兼有之乎居山中  
了不見邸報然仁兄奏疏向亦曾讀一二篇不隨不  
激甚得風議之體異於今之鈞微發隱作不平之聲  
者仁兄作用世大臣必矣山中入所以彈冠而稱慶  
也

答無跡

入秋屢欲來而家事相絆又有武昌之行邇來婚葬  
事迫直至殘臘始得息肩然近來悟得世事卽是佛  
事一切處之得宜可以庇廕人卽是行菩薩行耳雖  
不能忍事亦不敢厭也六侄事分家俱妥矣聞宋公



在菴恨不得插翅飛來一會但此身脫不得益見此  
公之大力量勝我等怯弱萬倍也吊儀槩不敢受  
謹此壁上謝謝護法堂得令孫照管暫且停功以生  
明歲有吳越之游至甲寅年遊與旣倦方入山中此  
時當一切委棄也臘月決意一來雖不可定然已有  
十分且留宋公過冬當得一晤也

寄長孺

數年來不得兄一字甚念亡兄已於去臘歸山矣屈  
指便是三年光景倏忽可悲可嘆前夏道甫有字來  
云已外轉尚未得真消息若有便羽璽寄數行以慰

岑寂也。慎軒先生遂亦下世。蒲桃象所聚首諸公，漸如辰星矣。言之可爲泣下。今年欲打疊東下而游，裝大未易辦。又度未能俛仰時人，故牽一舟往來昇澗間以畢此生。又不知何日得晤兄也。敝門生九溪諸生陳君垣，名今寔世，萬戶其尊人歿于王事。此君羽林孤兒，以查功次入京武弁，而工翰墨。兄幸一青目之。若有字附此君來爲便也。

寄楊制科文弱

不肖獲交于海內賢士大夫，最早今耆舊凋喪，不勝淒涼。幸近郡有兄丈，此天贊我也。老來不寂寞矣。別

去與崔兄坐舟中想念溫顏致語爲之腸痛屢日歸  
來未浹旬卽遊太和挾奇搜勝頗多異巖飛瀑人所  
未經見者近日避暑沙頭聞有令嗣之變世界闕隘  
誠爲可嘆一付如幻三昧調治不可過痛增堂上華  
髮老人憂也衡嶽之遊在八月之杪不知比時得同  
往否偶有筆工之便附字奉詢忙中百不達一卽大  
和詩紀統嗣致也

寄無跡

太和歸來卽以毒熱未至玉泉八月又感時瘴今方  
痊可入府送侄兒考校且雲浦新歸必有數月聚首

屈指便是來春匡之勝形于夢寐只是緣慳奈何  
柴紫菴已有次第待師來同住不肖明歲又有老父  
葬事在七八月只好近遊舍玉泉無可往者雲浦尚  
家居不出天下好山水易得好朋友難得無論兩居  
士需師卽師亦需兩居士也早早飛錫如何令孫來  
匡山草寄字不一

答王勁之

去歲至鄂則兄已還黃泥惆悵不可言喻張丈來得  
佳刻種種兄真可以不朽矣弟年來懷抱作楚久踈  
筆研惟嬉游白太間期作一世間閒人今秋偶遭時

瘴益習靜嬾雖愛山水而憚遠游又不知何日得與  
兄共燕笑也檢生平詩文止得二十餘卷回閱少作  
幾欲覆瓿既無力刻又無人寫以此不得請教吾兄  
非秘之也張丈來附字奉候所云詩序終不敢辭然  
此時一構思則動火矣後年都試自得聚首卽弟集  
亦需兄序統俟面晤商量耳

寄龍君御

仁兄過襄中時正弟登太和時也返襄中王孝廉道  
及踪跡并近况甚悔相失及入郢則傳叔睿致盛兄  
并佳詩歸家又見弟唁諸賜情文藹如故人用情何

其重疊也弟自太和歸來卽感時瘡調養至殘腊始  
離藥餌以此甚闕修候聞近來持金剛經且深悟禪  
理此是千古英雄歸根一着子不然卽功高天下名  
震一世終歸墮落大慧云但熱惱逼時朗誦金剛六  
如偈語便是一貼清涼散也况深入之者乎入悟之  
法大畧具大慧中峰二語錄中若不于無義語中逼  
拶一番只成文字依通非到家消息也弟家居輟遠  
遊不知何日相晤言之惘惘

復暎幻然

承札云仁兄精進若此尚自怖生死兄弟輩業習深

重者乎所詢張半仙者實無其人止有一人姓謝號  
響泉原爲夷陵諸生曾于武當修行後亦學禪依先  
兄中即其地理較諸庸術稍異然弟于此道甚莽  
莽亦不知其果精否也今正回夷陵如仁兄欲會其  
人幸再寄一消息來此人日夜持咒念佛絕不索利  
長齋已久乃弟之道侶也卽不可專用亦極可商量  
有信來卽指點之至鵠灣矣蘇雲浦近不安烏栢然  
懷抱甚佳自咲袁小修苦心三十年尚不傳一第今  
已黃蓋金童復何所憾此雲浦近日之情語也仕  
能無一咲乎

寄雲浦

小園于初八日已交割與怡山矣來價卽以市一堤  
居已得安宅闔家感戴過分仁兄清貧囊橐此中又  
不能無隱痛耳有怡山在此弟亦頻來聚首吾輩家  
居或每歲以三月共聚理會此中亦一快事弟今歲  
自春至夏皆作山游寂寞久偶適詩酒之緣一迷月  
餘始覺而逃之乃知淨侶夾持之功最緊王尚甫已  
下世矣人命若此可嘆可嘆怡山來附字奉候不一

答王伯雨

自太和歸來徘徊村落間八月中復染時瘡日來始



有起色料理鷓鴣一枝以故仙鵝之約兄托空言讀  
來札模寫東山諸勝冷冷在目非胸中具有丘壑安  
能于牙頰間馳使清泉白石也漁父佳釋久已讀誦  
匆匆欲作數語而來使歸期甚迫需之異日必不食  
言燈下草率未能既所欲言天寒姑止遊興桃花開  
時當覓良晤也

答字宗文

往歲承大教僭草一序愧不能揚扈萬一嗣後游鄂  
渚冀一聚首而仙跡歸矣神交已久尚闕面覲頗有  
深歎兄丈自是海內慧人才子觀來札并佳作居然

不朽之林矣不肖年來事事以懶廢無意修詞承尊  
命勉爲一叙兄丈以爲可以灾木也方當梓之遠承  
盛貺實不敢登受而使者語甚力然以劣詞過分筐  
筥實不安也柄頭二詩具見手紳生何以當之相去  
不遠莫惜玉音爲望

寄須水部日華

客歲龍山之遊甚暢生以家兄卽歸去未得再奉塵  
譚爲歉春來居家園課兒曹章華春色付之夢想暮  
春當一至沙頭必得趨晤也游龍山得詩二律殊不  
成語幾欲秘之然是一段佳話敬書求教想有鴻篇

希見示也草率不盡欲吐統容面談不一